

■ GLOSSA

Princessas in spe

DA SILVIO CAMENISCH

Nus duas princessas in spe dain il maximum da finalmain deliberrar noss dus prencis da lur stadi da mats vegls. Bunamain bunamain fissan ils dus bunatschs restads mats vegls enfin la fin, e la fin sa, sto betg, davenstar pitra. So. Nus duas princessas en spe manain finalmain a fin la chaussa pendentia, autramain na vegnin nus tar nagina fin. Noss buns prinzi-consorts, anc èn els in spe, betg ditg pli, na vegnissan betg da sasezs tar ina fin, sacra, tirassan a la lunga vinavant, duain nus vegnir u tuttina betg. Sur sasezs n'èn els betg, noss dus quasi-quasi-prinzi-consorts nominads, ha schon duvrà nossa iniziativa, er energia, da dumagnar quels dus uschè lunsch.

Schon avant las nozzas roialas avantstantas essan nus, omaduas princessas in spe, fix und fertig, tantas energias avain nus duvrà, avain nus consumà da dumagnar quels dus umens indecis tar ina decisiun concreta, nus manegian cun perspectivadas concretas da durabilitad e persistenza. Nachhaltigkeit è oz dumandada en tut quai che nus faschain u er tralashain. S'accorsch'ins bain vi da nus duas princessas in spe quant magras che nus essan vegnidadas l'ultim temp. Ti Kate has prendì giu sai betg quants kilos en las ultimas emnas, magazins da bulvard sa spezialisads sin roials scrivon da la grondezza da confecziun 36 giu sin 32! Guarda po da na betg perder l'anè da tia sira morta lady Di.

Oje. Nus essan vegnidadas magras che noss



prinzi-consorts in spe n'han definitiv betg la massa da nus princessas-consortas in spe, faschain nus uschia vinavant. Mo pel ed ossa na vulan els betg, mes Albert segir betg. Hai jau insatge vi dad el, vul el schon segir er insatge vi da mai. Il mund globalisà i vul vesair durant las transmissiuns televisivas da nossas duas nozzas. Jau, la Kate, sto mangiar, jau na dastg betg pigiar uschia sco la bellezza princessa-consorta Letizia. Tant na stoi betg esser. Uschia na savess noss unic expert da roials rumantsch era betg pli tge dir! U bain. Insatge sa quel segir dir. Jau i na savess betg. Adels-Experte è ses titel d'onur inserì sin noss televisurs plats. Mes titel n'èsi betg.

L'expert da roials sa dir La nus consuments tut sur dals envidads che nus na savevan anc betg, ussa savain nus. Gist defileschan sai betg quants pèrs roials u er apparents tras noss televisurs e vegnan numnads cun nums e rangs e curs da la vita fin ussa. Ussa tar insaquants e schon er insaquants ha la vita fin dato prendì en curius curs, infurmescha nus consuments l'expert e vegn confermà dal co-expert. Grazia. Omaduas èn burgaisas s'auzadas en posiziuns da noblezza. A mai burgais na succeda

quai betg, ni en la vita matrimoniala ni litterara. A mai segir betg, ma a la concorrenza segir schon, vulan ils dretgs ch'i succedia.

Nus omaduas princessas in spe avain stuì, avain vulì ans convertertar la suletdretga cardient-scha, che sa esser mo catolica ed apostolica, n'è bain betg pretendì da nus da memia, dastgain er esser engraziaivlas persuentar a noss prinzi-consorts e lur baselgia. Essan nus er, ves'ins bain? Nus avain schon laschè battegiar enturn in vegl patriarc da las famiglias dinastas, e battens da creschidas e latiers princessas in spe en funtaunas publicas èn adina in spectacul public. Anoravers fiss cun quai mantegnida la fassada, internamain savain nus princessas-consortas in spe convertitas esser verdeliberalas tant sco nus lain e sortir da l'energia atomara. Ad interim na lain nus plitost betg che bain.

Nus princessas in spe lessan ch'era quai vegniss discutà e commentà professionalmain tranter ils experts da roials, nus normalmortals i na savain gea betg. Il bitsch suenter è la culminaziun, è il climax da las nozzas, sin quel spetga l'entir mund. El vegn mesirà cun cronometer, il bitsch suenter, e discutà viv tranter noss experts, datti tar nus duas princessas-consortas betg pli in spe, ussa betg pli, jau la Kate, jau la Charlene, insatge sco prepotenza, nus manegian persistenza tar noss omadus prinzi-consorts William ed Albert, u tuttina betg. Anc è tut fitg empermettent sin noss televisurs, u betg experts?